

## Kah 上帝相 Tú

伊夢見有一個梯 khiā tī 地裡，梯頂抵天，有上帝 ê 使者 tī 梯裡 teh 起落。

(《全民台語聖經》創世記 28：12)

我 gín-á ê 時，見若破病，我知影除了我會有病痛 kah 痛苦以外，我 mā 會受 tiòh 惡夢 ê 折磨。Tī 夢中，一隻有痛狗病 ê 狗 á，嘴裡起泡，tiā<sup>n</sup>-tiā<sup>n</sup> teh jiok 我。我想 beh 走，m̄-koh，我 ê 腳 kiōng-beh 徙 bē tín 動。Chit 隻狗 á jú jiok jú 近，當牠開始 beh kā 我咬 ê 時，我 tòh 醒起來，kui 身軀冷汗。

後來，當我變成出名，開始四界演講 ê 時，我有一個無全 ê 惡夢。Tī chit-ê 夢中，我 chhōe 無任何物件 thang 穿。我四界 chhiau-chhōe，m̄-koh，我 ê 衫褲 lóng 是破 kô-kô，á 是全全油；有時，我甚至根本都 chhōe 無任何衫褲。

雅各 mā bat 有一個夢，m̄-koh，它 m̄ 是惡夢；伊是夢見 kah 上帝相 tú。Tī 一個叫做別是巴 ê 所在，伊夢見一個梯 tú 天，天使 tī hia peh 起 peh 落。上主忽然出現，對伊講：「我是上主—你 ê 祖先亞伯拉罕 ê 上帝，mā 是以撒 ê 上帝。我 beh kā 你 chit-má 所睏 ê 地賞賜 hō 你 kah 你 ê kiá<sup>n</sup> 孫。」(創世記 28：13)。

Tī chit-ê tāi-chì 以前，雅各 kan-ta<sup>n</sup> 對伊家己 ê tāi-chì 有趣味。M̄-koh，

chit-má，tī chit-ê 奇怪 ê 夢中，上帝 koh 再確認祂 kah 亞伯拉罕所立 ê 約。雖然雅各不配得 tiòh 這，因為伊一生 lóng 講白賊 kah 欺騙，m̄-koh，上帝伸手來接納伊，疼伊，實際上，祂 koh 講：「我 beh 保護你一世人。」

咱 lóng 有一 koá kah 雅各全款 ê 情形；咱 lóng 是充滿罪過，koh kan-ta<sup>n</sup> 留意家己。準做是 án-ne，上帝 iáu-koh 是向咱伸手，kā 咱講，咱若相信基督，咱 tòh 會受拯救，而且無啥物 ē-tàng hō 咱 kah 上帝分開。He tòh 是保護，he tòh 是安全，而且 tī 基督 ê 內面，he lóng 是咱 ê。

**祈禱：**上帝 ah，感謝祢 kā 我包括在內，通過基督，tī 祢 kah 亞伯拉罕 ê 約中間受 tiòh 祝福，而且祢 koh 再對雅各確認 chit-ê 約。感謝祢提醒我，當我 bē-tàng 做啥物來得 tiòh 祢 ê 赦免 kah 祝福 ê 時，我 iáu 是有責任來遵守祢 ê 誠命，koh tiòh 努力生活，來跟 tòe 祢 無瑕疵 ê Kiá<sup>n</sup>—耶穌基督 ê 腳步。我奉 祢 ê 名祈禱。阿們。

(2007.10.14)